

Gnûfs furlans a cressin

ARLeF e Ucai Fvg intune cui zovins forescj e cui imigrâts di seconde gjenerazion par discuti di Friûl, lenghis, dirits e identitât

Si è a pene concludût, inte sede de ARLeF (Agenzie Regjonâl pe Lenghe Furlane), un incuintri/laboratori, tignût dal president de Agenzie, Lorenzo Fabbro e intitulât: “Friûl, lenghis, dirits, identitât(s)”, là che a àn partecipât un grup di fantats des secondis gjeneracions di imigrâts e students forescj che a studiin te Universitât dal Friûl.

La iniziative, fate in colaborazion cu la Union des Comunitâts e Associazions di Imigrâts - Ucai Fvg – e à viodût la partecipazion di une trentine di zovins, cualchidun di chescj cun citadinance taliane, di nazionalitât thailandese, ghanese, russe, moldave, serbe, albanese, brasiliane (nevôts di furlans imigrâts in Brasil), rumene, spagnole, canadese, todescje e argjentine. A compagnâ il grup e je stade la referente de Ucai pal projet “Percors Interculturâi”, dotore Arminda Hitaj. Dilunc dal laboratori a son stadis frontadis diversis tematichis tant che la storie dal Friûl e lis sôs componentis etnichis linguisticis; il rapuart tra il nestri teritori e la emigrazion/imigrazion; il plurilinguism dal Friûl; lis politicis linguisticis; la composizion sociâl dal Friûl, i dirits, chei linguistics in particolâr, e ancje il teme de identitât/des identitâts.

I fantats a àn partecipât cun entusiasim, grande atenzion e curiositât, confermant che la ricjece e la diversitât linguistiche e culturâl a ufrissin dal sigûr vantaçs e oportunitâts e che il Friûl al è un puest pardabon “speciâl” di chest pont di viste. Nissun pregiudizi, anzit, viers de lenghe furlane – comprendude de maiorance dai presints e ancje fevelade cun naturalece di cualchidun – valutade in maniere unanime tant che *plus* culturâl e ancje tant che element impuartant par “vivi” ad implen il teritori, bon pe integrazion e pe coesion sociâl.

Cheste iniziative e je la ultime di un cicli di incuintris/laboratoris dedicâts ai zovins forescj, ai zovins imigrâts di seconde gjenerazion e ai zovins talians sul teme de lenghe e de culture furlane, là che a son stadis metudis a confront someancis e diferencis che a concorin a definî la lôr identitât in clâf culturâl e teritoriâl. Il projet “Percors Interculturâi” al è inmaneât dal Ucai Fvg in graciis dal finanziament de Regjon (Program Imigrazion 2017) e cu la adesion dai Comuns di Udine, Resie e Tavagnà, de ARLeF, di Confartigianato Udine e dal Ires - Fvg.

Udin, ai 19 di Jugn dal 2018

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<